

皇清經解續編

皇清經解集編

皇清經解續編卷千百八十

南菁書院

禮記鄭讀攷一

侯官陳喬樅樸園著

曲禮上

宦學事師非禮不親

注云學或爲御

先子曰鄭氏禮記注引出本經異文及所改經字凡言或爲某者禮記他本也凡言讀爲某當爲某者皆據經典以定之也喬樅謹案說文數覺悟也从教門門尙矇也曰聲學篆文數省據此知數卽古文學字學記論教學相長引兌命曰學學半廣雅釋詁曰學教也教語也釋名釋言語曰御語也左氏春秋桓十四年鄭伯使其弟語來盟穀梁作禦莊子漁父篇甚矣子之難語也釋文本本亦作悟是學悟語御訓義並得

展轉相通御字蓋語之假借文王世子篇凡語於郊者鄭注以爲語於郊學古者語於郊學皆有行禮之事故云非禮不親也詳見禮堂經說

幼子常視無誑

注云視今之示字

先子曰士昏禮視諸衿鞶注曰視乃正字今文作示俗誤行之喬樅謹案詩小雅鹿鳴視民不忮箋云視古示字也孔冲遠詩正義云古文以目視物與以物示人同作視字賈洛州儀禮士昏禮疏說同攷說文見部視瞻也从見示聲眎古文視眎亦古視字示部示天垂象見吉凶所以示人也从二

古文

上

三𠂔日月星也觀乎天文以察時變示神事也段氏玉裁

注云許書當本作所以視人也示視古音同部以疊韻爲訓

喬樅謂視古文眎眎二形知古者瞻視字作眎眎而以視爲視人字周禮視並作眎可證也漢書猶多以視爲示視人者使人見之故字從見其作示者俗所誤行耳

拾級聚足 注云拾當爲涉聲之誤也

案匡謬正俗云此言升階歷級每一級則並足然後更登拾者猶言一一拾取而鄭注讀拾爲涉近乎穿鑿顏說非也惠氏棟禮記古義云周書嘗麥解曰王涉階故鄭讀從之洪頤煊讀書脞錄云內則不涉不擻鄭注擻揭衣也正義言於尊所不因涉水不敢揭衣案不涉不擻謂不涉階則不揭衣正義失之惠洪兩說是也攷說文涉徒行瀦水也

瀦或砾字各本作厲誤

砾履石渡水也涉水者必兩足相隨躡之毋敢越歷防失墜



也涉階者亦前足躡一等後足從之併不得相過重蹉跌也  
涉階之義蓋從涉水而引申之涉古音在第八部拾古音在  
第七部二部相近故涉字聲誤而爲拾也

一曰涉卽陟之假借說文陟登也从阜步阜下云𡵓古文段  
氏注云上象紮高下象可拾級而上又陟下注云爾雅釋詁  
陟陞也毛詩傳陟升也升者登之假借禮喪服注曰登今文  
禮皆爲升俗誤已行久矣據鄭注則古文禮皆作登也陟從  
阜步謂緣阜而步也阜有層次可尋是謂會意

以箕自嚮而扱之 注云扱讀曰吸謂收糞時也

案扱說文云收也从手及聲是扱本有收義而鄭君必讀曰  
吸者以扱字古通插禮問喪扱上衽謂插衣於帶是也又訓

爲引儀禮士冠禮婦拜扱地謂引手至地是也故於此扱字  
讀從吸此鄭君審覈聲音訓詁以定之者也說文吸內息也  
从口及聲引伸之爲凡吸取物之義素問離合眞邪論吸則  
內鍼注云吸謂氣入是也凡氣之出入噓則散吸則斂吸訓  
內息是有斂取之義故陸德明釋文云吸斂也衆經音義四  
吸古文歛喻二形歛亦斂也義見後漢書張衡傳注鄭意亦  
承上文言勿使其塵坳起及於長者之前故云謂收糞時也  
孔氏正義謂以其穢物少吸然則盡不得爲一扱再扱故讀  
從吸義尙未瞭

席閒函丈

注云丈或爲杖

案釋文云丈如字丈尺之丈王肅作杖正義據文王世子侍

坐於大司成遠近閒三席席之制三尺三寸三分寸之一則  
三席是一丈故鄭云容丈謂所布兩席相去使容一丈之地  
足以指畫也王肅以爲古人講說用杖指畫故使容杖也是  
王肅從禮記或本杖之制長短未詳儀禮喪服傳曰杖各齊  
其心此喪杖也禮記王制曰五十杖於家六十杖於鄉七十  
杖於國八十杖於朝此齒杖也周禮攷工記廬人爲廬器爰  
長尋有四尺曾矛常有四尺夷矛三尋說文云爰以杖殊人  
也禮爰以積竹八觚長丈二尺建於兵車虎賁以先驅方言  
云凡矛柄謂之矜矜謂之杖此兵杖也喪杖最短兵杖最長  
而齒杖酌乎二者之中當必以丈爲度故字從木丈聲說文  
云丈十尺也从又持十又云夫丈夫也周制八寸爲尺十尺



爲丈人長八尺故曰丈夫則杖之从丈蓋亦以八尺爲率取  
人身之長以爲節也續漢書禮儀志云孟秋之月按戶比民  
年七十者授之以玉杖八十九十禮有加賜玉杖長九尺九字  
今本脫去據太平御覽引補端以鳩鳥爲飾王子年拾遺錄載糜竺事云  
今以青廬杖一枚長九尺呂氏春秋異用篇孔子以六尺之  
杖諭貴賤之等辨親疎之義此足知杖之爲制長不踰丈短  
不過六尺也

歛髮毋髻

注云髻或作肆

先子曰周禮夏官小子羊肆注肆讀爲髻喬樅謹案說文髻  
髮也从髟易聲重文髻云髻或从也聲又云髮髻也从髟皮  
聲詩君子偕老篇不屑髻也周禮追師注引作不屑髻也此

三家詩之異文是髡髻字同左傳哀十七年衛莊公見已氏之妻髮美使髡之以爲呂姜髡注云髡髮也是髡髮義同髡者髡髮之稱髡或作肆者肆餘也髮之餘者必垂故鄭君釋毋髡謂勿垂餘如髮也古者肆肆字多通假周禮小宗伯肆儀爲位注云故書肆爲肆杜子春讀肆當爲肆儀禮聘禮記俟于郊爲肆注云古文肆爲肆可證也鄭注周禮讀羊肆爲羊髡髡者髡之假借士喪禮其實特豚四髡去蹄注云今文髡爲剔剔字乃髡之省文髡說文云髡髮也髡本髡髮所爲髮也故古卽假髡爲髡字

跪而遷屨 注云遷或爲還

案還旋也旋轉也遷亦旋轉之意國語吳語彼近其國有遷

注云遷轉退也文選西京賦遷延邪睨薛綜注云遷延退旋也是其義已少儀曰侍坐於君子君子欠伸運笏澤劍首還履問曰之蚤莫雖請退可也釋文云還音旋正義云還轉也謂君子自轉履也尊者脫屣於戶內是屣恒在側故得自還轉之然則君子之還屣爲將納屣也此侍坐於長者屣不上於堂解屣不敢當階禮畢而退爲長者所送不得退於隱辟而著屣故於階側轉屣使稍近前而納之也

其飯不澤手 注云澤或爲擇

案澤擇音同義通故得假借用之射義曰天子將祭必先習射於澤澤者所以擇士也是澤本有擇義鄭不從或本者以擇訓揆莎宜從澤爲正或本乃假擇爲澤字耳少儀曰運笏

澤劍首注云運澤謂玩弄也玩弄亦摩莎之意

生與來日死與往日

注云與或爲予

案與予古以同音通用詩于旄何以予之論衡率性篇作何以與之采菽何錫予之白虎通攷黜篇作何錫與之皇矣此維與宅漢書郊祀志下及谷永傳引詩與並作予左氏定十年傳宋其尾鬣以與之五行志下之上引亦作予論語顏淵篇君孰與足谷永傳作君孰予足皆其證也

前有士師

注云士或爲仕

案士仕聲同仕卽士之通假隸釋載馬江碑仕喪儀宗帝堯碑魚師衛仕皆假仕爲士字周禮地官載師以宅田士田賈田任近郊之地注云士讀爲仕此又假士爲仕字也



急繕其怒 注云繕讀曰勁

案周禮夏官繕人注云繕之言勁也善也賈疏云以其所掌弓弩有堅勁而善是繕本有勁義此言急繕其怒當取急疾堅勁爲義故讀繕曰勁勁字宜訓爲強正義云急堅也勁利也其義未協素問腹中論曰其氣急疾堅勁足證急繕卽急勁古有此語也

交遊之讎不同國 注云交遊或爲朋友

案交遊卽指朋友周禮地官調人云從父兄弟之讎不同國又云主友之讎視從父兄弟是爲朋友有報讎之義與此朋友之讎不同國合但父母存則不許友以死耳

筴爲筮 注云筴或爲著

案筴與蓍義通月令太史釁龜筴注云筴蓍也是已筴又與  
莢字通少儀莢籥注云莢蓍也是已正義曰謂蓍爲筴者筴  
以謀筴爲義言用此物以謀於前事也國語晉語決之以卜  
筮乃公子親筮之注並云蓍爲筮此從禮記或本也

日而行事則必踐之 注云踐讀曰善聲之誤也

案踐善音近古 借用之毛詩東門之栗有踐家室韓詩  
作靖云靖善也言有善人可與成爲家室也是以聲近假借  
也釋文云踐依注音善王如字云履也正義引王肅云卜得  
可行之曰必履而行之踐履也義與鄭異

左右攘辟 注云攘卻也或者攘古讓字

案說文揖攘也攘推也段氏注云古推讓字如此故曲禮注

曰攘古讓字許云讓者相責讓攘者推也此從古也漢書禮樂志盛揖攘之容菽文志堯之克攘司馬遷傳小子何敢多攘皆用古字凡退讓用此字引申之使人退讓亦用此字如攘寇攘夷狄是也

大夫士必自御之 注云御當作訝訝迎也春秋傳曰跛者御跛者眇者御眇者皆訝也世人亂之

案儀禮士昏禮媵御沃盥交注云御當爲訝訝迎也讀與此同迎訝字惟周禮文作訝他經皆作御說文訝相迎也周禮曰諸侯有卿訝也从言牙聲段氏注曰此秋官掌訝職文也詩百兩御之毛曰御迎也以御田祖箋云御迎也書予御續乃命于天弗御克奔以役西土御衡不迷某氏皆訓迎則皆

訝之同音假借衛包於尚書改御爲迓徐鉉遂於說文增迓  
字云迓或从疋按迓俗字在許後衛包無識用以改經不必  
增也

立視五儻

注云儻猶規也謂輪轉之度儻或爲縈

案說文云儻周燕也从隹少象其冠也罔聲一曰蜀王望帝  
化爲子儻鳥故蜀人聞子儻鳴皆起曰是望帝也子儻卽子  
規杜鵑鳥也儻規聲相近故古人假儻爲規字釋文云車輪  
轉一周爲儻一周丈九尺八寸也正義說同集韻十二齊云  
車輪轉一周爲轡通作儻轡字見玉篇車部儻蓋卽轡之消  
借儻或爲縈者亦以聲相近縈音汝垂切見集韻五支又越  
儻之儻或音息委切縈垂之縈或音如纍切古音同在十六



部又𦣻字从𦣻𦣻音才案才規二切聲與𦣻同故得通假用之𦣻陸氏釋文本作𦣻云𦣻本又作𦣻𦣻𦣻皆卽𦣻之俗體曲禮下

大夫則綏之 注云綏讀曰安安之謂下於心

案古安字多作綏漢人文字尙然儀禮士相見安而後傳言注云古文安爲綏漢書燕刺王旦傳北方以安注云安古綏字是其證也檀弓退然如不勝衣注云退或爲安是安與退同義春秋傳交綏謂兩退是綏亦有退義退猶下也下文國君綏視注讀綏爲安與此義同疏引庾氏曰安頽下之貌蓋執器以心爲平故安之謂奉下於心視瞻以面爲平故安視謂視下於面也